

A Friuli Doc par cognossi i fantats di YoupaTubo e la Tiktoker furlane Greta

Domenie ai 10 di Setembar, aes 16, tal stand "Aperitivo lo sono Friuli Venezia Giulia", l'event promovût de ARLeF e dedicât ae scuvierte dal mont dai social in lenghe furlane

Il program de ARLeF - Agenzie regjonâl pe lenghe furlane par Friuli Doc 2023 si indrece in particolâr ai zovins e aes gnovis tecnologjiis.

Domenie ai 10 di Setembar, aes 16, tal stand "Aperitivo lo sono Friuli Venezia Giulia" in Zardin Grant, graciis ae colaborazion consolidade cun PromoTurismoFVG, al è in program un apontament speciâl li che la protagoniste e sarà la gjenerazion Z (ma no dome): "YoupaTubo e Tic e Tac furlan" al sarà un event dedicât a scuvierzi il mont dai social, in dut e par dut in lenghe furlane!

Insieme ai zovins youtubers di YoupaTubo (Lucia Bello, Federico Benedet, Davide Buccheri, Mattia Cantarutti, Desiree Chiappo, Francesco Colombino, Nicolas Fonzar, Federico Iob, Diego Scarsini, Fabio Valvason) e ae tiktoker Greta Fabbro al sarà pussibil cognossi miôr i canâi YouTube e TikTok "made in Friûl". Ducj adun, lis fantatis e i fantats a contaran cemût che e je nassude la lôr aventure digjitâl in lenghe furlane, e soledut a pandaran ce che al sucêt daûr des cuintis dai lôr videos. Cun di plui, a fasaran viodi cualchidun dai videos che ju an fats cognossi al grant public e a rispuindaran aes curiositâts dai presints.

Cun 54 filmâts publicâts, 3 milions di interazioni, plui di 1 milion di visualizacions e 11 mil iscrits, YoupaTubo, il canâl YouTube promovût de ARLeF, al va indevant a cressi cence padin, cui siei protagoniscj che a son simpri plui cognossûts sedi su la rêt che fûr. Nol è di mancual Tic e Tac Furlan, li che Greta e la sô gjate brasiliane Preta a proponin al public di Tiktok induvinei linguistics, curiositâts, gramatiche in pirulis, tante simpatie e plui di cualchi efiet speciâl. Vuê il canâl, cun plui di 80 clips publicadis, al à passât i 14 mil followers, al à plui di 133 mil "mi plâs" e passe 13 milions di visualizacions.

La partecipazion de ARLeF a Friuli Doc e je un apontament consolidât di agns in grazie de colaborazion cul Comun di Udin e cun PromoTurismoFVG che e da acet ae Agenzie tai siei spazis. Si trate di une ocasion impuartante par valorizâ la lenghe furlane dentri de manifestazion enogastronomiche plui impuartante dal teritori.

Udin, ai 8 di Setembar dal 2023

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. +39 340 3546890 / Adriana Cruciatti - mob. +39 335 6853775

<<<<<<<<<<<<